

իւրոց : Եւ 'ի թախանձելն նոցա առնել Հաւասար Յունաց ըստ ծիսից և արարողութեանց , և ապա հոգալ զպահանջ նորին . նա յայտնապէս ասէր թէ չտամ աւելի քան ըզխոստացեալն իմ : Եւ 'ի մեկնիլ նոցա անտի , կոչեցին ըզնոսա գործակալքն , եւ իբրեւ յանդիմանութիւն ասէին թէ շատացարուք առ այժմ , յետոյ ամենայն ինչ կատարի շնորհիւ Արքայի , այլ դուք ոչ կամեցայք լսել , և այսպէս վատթարացուցիք զգործն : Տարակուսեալ էին Հայք՝ զի յողզողդ միաք եւ անհաստատ խոստմունք Դատաւորին չտային վստահութիւն մխիլ 'ի գործ . սակայն Խօճաքեանն առեալ տարաւ զնոսա առ Դատաւորն , և 'ի ճանապարհին յորդորէր շահել զմիտս նորա , եւ յաղագս փոքր իրաց չխանդարել զգործն : Եւ իբրեւ յանդիման եղեն ասէ՝ Էֆէնտի , ընդէ՞ր ոչ կատարես զգործս սոցա . և նա ասէ . դուքա խաղ արարին զիս պահանջելով զաւելորդ իրս , եւ յանձն առ կատարել զառաջին խոստմունս իւր , և այրն երաշխաւոր եղեւ , յետոյ ասէր Դատաւորն թէ՛ յետ գնալոց Սախարեային 'ի Դամասկոս , եթէ հրաման ելցէ անտի յայլ կերպ՝ չմիջամտեմ . առ այս շփոթեալ Հայոց ասեն , ուրեմն որողայթ պատրաստես մեզ դառնալով 'ի խոստմանէդ , այլ նա ասէր՝ զայս իբրեւ զուարճութիւն խօսեցայ ընդ ձեզ , ոչ դառնամ 'ի բանից իմոց , և Խօճաքեանն քաջալերէր զնոսա չերկնչիլ , այլ փոյթ տանել 'ի կատարումն գործոյն , զի ինքեանք եւս մեկնեցին 'ի Կոստանդինուպօլիս : Եւ յետ մեկնելոյ նորին , սկսան կատարել զգործ սակարկութեան . ետուն նմա գրել և հաստատել կնքով իւրով կատարել զամենայն ինչ զոր խոստացաւն եւ ինքեանք ետուն նմա մուրհակ պարտուց կնքով Պատրիարքին , հատուցանել զգումարն սակարկեալ յետ կատարման գործոյն , այսպէս իբր բարեկամացեալ ընդ նմա մեկնեցան անտի :

Ի վաղիւ անդր կազմեաց ժողով մեծ 'ի Ս . Յարութիւն , հրաւիրեալ անդ զԳործակալս եւ զԱւագանին քաղաքին . գնացին և գլխաւորք Հայոց և Յունաց . բազմեցաւ Դատաւորն ուրախ եւ զուարթ 'ի սրահ Գերեզմանին իւրովքն հանդերձ , և ասէր իբր յանդիմանութիւն Յունաց . զամենայն տեղիս ձեր շինեցիք շքեղ և պայծառ եւ զխորանն